

Berdosa lebih beribadah?

Soal Jawab Agama

Bersama **DR. MOHAMMAD NIDZAM ABDUL KADIR AL-JARUMI**
Pensyarah di Fakulti Ekologi Manusia, Universiti Putra Malaysia dan
pendakwah bebas. Kemusykilan boleh diajukan ke nidium@yahoo.com

BENARKAH berlebihan dalam ibadah lebih besar dosanya daripada berzina? Ini kerana ada terdengar ceramah menyatakan perkara sedemikian?


JAWAPAN: Apakah maksud berlebihan dalam ibadah?

Adakah maksudnya terlalu banyak membaca al-Quran, contohnya satu hari 10 juzuk? Jika banyak membaca al-Quran dikira sebagai berlebihan dalam ibadah, maka kenyataan bahawa perbuatan itu lebih besar dosanya daripada berzina adalah ternyata salah. Contoh lain, zikir tasbih

selepas solat ialah 33 kali. Jika seseorang itu berzikir sebanyak 300 kali selepas solat, adakah ia dikira berlebihan dalam ibadah dan dikatakan bahawa berlebihan dalam ibadah lebih besar dosanya daripada zina? Ahli ibadah zaman dahulu sangat banyak melakukan ibadah. Selawat yang

mereka amalkan terlalu banyak, malah ada generasi salafussoleh yang khatam al-Quran ribuan kali sepanjang hayat mereka. Mereka adalah ahli ibadah yang soleh. Tidak pernah dinyatakan bahawa cara amalan mereka itu sebagai berlebihan dalam ibadah. Maka saya berpendapat

bahawa kenyataan kepada persoalan ini adalah tidak benar. Ibadah boleh dilakukan sesuai dengan keadaan setiap individu. Ada ibadah yang tetap dan tidak berubah contohnya bilangan rakaat dalam solat fardu. Namun, banyak ibadah lain anjal dan boleh berubah contohnya bilangan zikir.



Hukum puasa enam Syawal

APAKAH hukum tidak berpuasa enam hari pada bulan Syawal?

JAWAPAN: Berpuasa enam termasuk dalam puasa sunat. Oleh itu, tiada kewajipan dan kefarduan untuk

melaksanakannya. Maka sesiapa yang ingin melakukan puasa enam hari pada bulan Syawal maka ada ganjaran pahala. Sesiapa yang tidak berpuasa enam hari ini maka dia tidak berdosa.



Imam batal, bagaimana dengan makmum?

SOLAT imam terbatal. Adakah solat makmum juga dihukum sebagai batal?

JAWAPAN: Ada pendapat menyatakan bahawa apabila solat imam terbatal, maka solat makmum juga dihukum sebagai batal. Walau bagaimanapun, pendapat sebegini agak memberatkan masyarakat.

Contohnya imam solat terlupa untuk berwuduk. Maka imam solat fardu isyak dan sunat tarawih dalam keadaan tidak berwuduk. Selesai solat, imam teringat bahawa beliau tidak berwuduk. Maka satu kezaliman terhadap masyarakat jika dihukum solat makmum tidak sah hanya kerana solat imam yang tidak sah.

Bagaimanapun, jika solat imam tidak sah sedangkan makmum mengetahuinya dan tetap mengikut imam, maka ada kewajipan jika solat makmum dihukum sebagai tidak sah. Namun, jika para makmum tidak mengetahui solat imam tidak sah, maka sewajarnya solat makmum dihukum sebagai sah.